



31. marts 2026

UPA26/207

Qanoq iliornikkut kommuunit akornanni aningaasaqarnikkut innuttaasullu katitagaanerisigut naligiinnerulernissaq anguniarneqassanersoq pillugu apeqquteqaat aallaavigalugu oqallinnissamik siunnersuut.

(Inatsisartunut ilaasortaq Erik Jensen, Siumut)

Tamatta ilisimavarput ineriartortoqarunnaartillugu innuttaasut neriuutaarullutik taaqqoraluttuinnartarnerat.

Qularinngilara kommuunit akornanni aningaasaqarnikkut naligiinnginnerup ilumut piunera Inatsisartut Naalakkersuisullu tamarmik arajutsisimanngikkaluaraat. Qineqqusaarnerimmi tamarluinnaasa nunatta naligiinnerusumik ineriartortinneqarnissaa tamarluinnatta qineqqusaarutiguarparput.

Taamakkaluartoq kommuunit akornanni naligiinnginneq annertusiartuinnartoq taamaattussaannartut akuerisutut illutigu isiginnaaginnarparput, utoqqatsissutigalutigu innuttaasut sumi najugaqarusunnerat politikikkut aqunneqarsinnaannginneranik tunngavilersuuteqartarneq. Taamatut tunngavilersuuteqartarneq isumaqatiginngilara. Ilaatigut pissutigalugu isumaqarama pisortat suliffeqarfiutaasa sumi inissisimanissaannik politikikkut aalajangerneqarnerisa aalajangertaraa innuttaasut sumi najugaqassanersut.

Assersuutigiinnarlugu Tusass, Nukissiorfiit, Royal Greenland, Royal Arctic Line, Air Greenland, Visit Greenland, Greenland Airport, Sikuki Nuuk Harbour, Nalik Ventures, Asiaq, ilinniartut, Naalagaaffiullu susasaqarfii assigiinngitsut Nuummi inissisimanngikkaluarpata qularnanngitsumik taakkua sulisorpassui ullumikkut Nuummi najugaqarsimanaviannngikkaluarput. Nalinginnaasuuvormi innuttaasut ilinniakkaminnut tulluurtumik akissarsiaqissaarnerusumillu periarfissaminnik toqqaasarnerat, soorlu qanga siulivut pinigassat malillugit inuusimasut.

Eqqaamaneqassaarlul suliffeqarfiit privatimik pigineqartut taamak amerlatigisut Nuummiinnerannut pissutaaqataammat, pisortat suliffeqarfiutaasa siuliani pineqartut Nuummiinnerat. Taakkuullutillu akileraarutitigut kommuunimut annertuumik isaatitsilluartut. Taamaattumik innuttaasut sumi najugaqarnissaat qanorluunniit politikikkut qanoq aalajangertoqarsimaneranik sunnerneqartarpoq imaluunniit aalajangerneqartarpoq.

Erseqqisaatigissavara una oqaluuserisaq minnerpaamilluunniit Nuuluarnermik tunngaveqanngimmat, nunattali naligiinnerusumik ineriartortinneqarnissaanik, kommunillu allat aamma inuusuttunik ilinniarsimasunillu aamma najugaqarfigineqarsinnaajuannarnissaannik kissaateqarnerummat.



Taamaattumik naligiinnerulernissamut ataatsimoortumik tapiissutitigut nalimmassaarineq kisimi aaqqissutissatut isigineqarnissaa mianersuutigeqqussavara. Pissutigalugu ilinniarsimasut aamma taakkuusarmata sumiiffimmi ulluinnarni inooqataanikkut pingaarutilimmik inissisimallutillu annertuumik kivitseqataasartut, soorlu meeqqat atuarfiisa imaluunniit suliffeqarfiit namminersortut ingerlalluarnissaannut.

Taamaattumik Inatsisartuni ilaasortaqtinnut Naalackersuisunullu apeqqutiginiarpara, qanoruna iliorluta inuusuttatta aammalu ilinniarsimasortatta aamma Nuup avataani ilinniakkaminnut tulluurtumik suliffissaqarsinnaanissaat aammalu ineriartornermut peqataanissaat qulakkeerniaripput?

Nunatta ukiut 10-20-it qaangiuppata qanoq iluseqarluni ingerlanissaa kissaatigaarput?

Kommuunip pisuujunerpaasup piitsuunerpaasullu naatsorsuutini ukiuni 2020-2024 ingerlatsinermi angusatigut 1.8 mia.kr.-nik nikingassuteqarnerat siunissami taamaattuaannartussatut ilumut akueriinnassavarput? (takuuk §37-mi akisut 2025/157)

Ukiuni 2020-2024 suliffeqarfiit iluanaarutaasa akileraarutaannik kommuunit appasinnerpaamik qaffasinnerpaamillu isertitaqarsimasut isertitaasa nikingassutaat 781 mio.kr.-soq siunissami taamaattuaannartussatut ilumut akueriinnassavarput? (takuuk §37-mi akissut 2025/157)

Kommuunini inuttussuseq aallaavigalugu kommuunit ilaat kommuunit ilaannut sanilliullugu 65-it sinnerlugit ukiulinnik 76%-mik innuttaqarnerunera siunissami taamaattuaannartussatut ilumut akueriinnassavarput? (takuuk §37-mi akissut 2025/175)

Isumaqaarpunga naligiinneruneq sumiluunniit atuutsillugu aammalu sumiiffiit ineriartornermut peqataatinneqartutut misigisimagaangamik naammagisimaarinninneq inuunermilu nuannaarneq tamatigut annertunerusartoq.

Taamaattumik nunaqqatigut aamma sinerissamiittut neriummik ineriartornermullu peqataatinneqartutut misigisimanermik tunisariaqarpagut. Tamattami nunatta tamarmi ingerlalluarnissaa soqutigisariaqarparput, oqaannarata innuttaasut sumi najugaqarnissartik namminneq aalajangertarmassuk tamanna allanngortinneqarsinnaanngitsoq. Tamanna uagut kalaallit ileqqorinngilarput.

Sineriak naligiinnerusumik ineriartoqatinneqartoq qineqqusaarutaanaanani timitalerneqartariaqalerpoq.

Qujanaq oqallilluarisilu.